

宋
名
家
詞

稼軒詞卷第二

滿江紅

建康史帥致
道席上賦

鵬翼垂空笑人世蒼然無物又還去九重淡處
玉階山立袖裏珍奇光五色他年要補天西北
且歸來談笑護長江波澄碧佳麗地文章伯
金縷唱紅牙拍看算前飛下日邊消息料想寶
香熏閣夢依然画舫清溪笛待如今端的約鍾
山長相識

又

中秋
寄遠

快上西樓怕天教浮雲遮月但喚取玉纖橫管
一聲吹裂誰做冰壺涼世界最憐玉斧脩時節
問嫦娥孤處有愁無應華髮雲液滿瓊盃滑
長袖舞清歌咽歎十常八九欲磨還缺但願長
圓如此夜人情未必看承別把從前離恨總包
藏歸時說

又

中秋

美景良辰算只是可人風月況素節揚輝長是
十分清徹著意登樓瞻玉兔何人張幙遮銀闕
倩飛廉特得爲吹開憑誰說 弦與望從圓缺
今與昨何區別羨夜來把手桂花堪折安得便
登天柱上從容陪伴酬佳節更如今不聽塵談
清愁如髮

又

春

點火櫻桃照一架荼蘼如雪春正好見龍孫穿

破紫苔蒼壁乳燕引雛飛力弱流鶯喚友嬌聲
怯問春歸不肯帶愁歸腸千結 層樓望春山
墨家何在煙波隔把古今遺恨向他誰說蝴蝶
不傳千里夢子規叫斷三更月聽聲聲枕上勸
人歸歸難得

又

可恨東君把春去春來無迹便過眼等閑輸了
三分之一晝永暖翻紅杏雨風清扶起垂楊力

更天涯芳艸最關情
烘殘日 湘浦岸南塘驛
恨不盡愁如織
算年年辜負對他寒食
便恁歸來能幾許
風流早已非疇昔
凭画欄一線數飛鴻
沉空碧

又

家住江南又過了清明
寒食花徑裏一番風雨
一番狼藉紅粉暗隨流水去
園林漸覺清陰密
算年年落盡刺桐花
寒無力 庭院靜空相憶

無說處閑愁極怕流鶯乳燕得知消息尺素如
今何處也綠雲依舊無踪跡謾教人羞去上層
樓平蕪碧

又

贛州席上呈太
守陳李陵侍郎

落日蒼茫風纔定片帆無力還記得睂來眼去
水光山色倦客不知身遠近佳人已卜歸消息
便歸來只是賦行雲襄王客 夢箇事如何得
知有恨休重憶但楚天特地暮雲凝碧過眼不

如人意事十常八九今頭白笑江州司馬太多
情青衫溼

又

賀王帥宣
平湖南寇

笳鼓歸來舉鞭問何如諸葛人道是凶凶五月
渡瀘溪入白羽生風貔虎諫青溪路斷鼙鼙泣
早紅塵一騎落平岡捷書急 三萬卷龍頭客
渾未得文章力把詩書馬上笑驅鋒鏑金印明
年如斗大貂蟬却自兜鍪出待刻公勲業到雲

霄渚溪石

又

漢水東流都洗盡髭胡膏
血人盡說君家飛將
舊時英烈破敵金城雷過耳
談兵玉帳水生頰
想王郎結髮賦從戎
傳遺業
腰間劒聊彈鋏
尊中酒堪爲別
況故人新擁漢壇旌
節馬革裹
屍當自誓蛾眉伐性休重說
但從今記取楚臺
風庾樓月

又

江行簡楊濟
翁周顯先

過眼溪山怪都是舊時曾識還記得夢中行遍
江南江北佳處徑須攜杖去能消幾兩平生屐
笑塵勞三十九年非長爲客 吳楚地東南坼
英雄事曹劉敵被西風吹盡了無塵跡樓觀甫
成人已去旌旗未卷頭先白歎人生哀樂轉相
尋今猶簪

又

敲碎離愁紗窗外風搖翠竹人去後吹簫聲斷
倚樓人獨滿眼不堪三月算舉頭已覺千山綠
但試把一紙寄來書從頭讀相思字空盈幅
相思意何時足滴羅襟點點淚珠盈掬芳艸不
迷行路客垂楊只碍離人目最苦是立盡月黃
昏欄干曲

又

倦客新豐貂裘敝征塵滿目彈短鋏青蛇三尺

浩歌誰續不念英雄江左老用之可以尊中國
歎詩書萬卷致君人翻沉陸休感慨澆醅醪
人易老歡難足有玉人憐我爲簪黃菊且置請
纓封萬戶竟須賣劔酌黃犢甚當年寂寞賈長
沙傷時哭

又

風捲庭梧黃葉墜新涼如洗一笑折秋英同賞
弄香按藥天遠難窮休久望樓高欲下還重倚

拚一襟寂寞淚彈秋無人會
今古恨沉荒壘
悲歡事隨流水想登樓青鬢未堪憔悴極目煙
橫山數點孤舟月淡入千里對嬋娟從此話離
愁金尊裏

又

冷泉亭

直節堂堂看來道冠纓拱立漸翠谷群仙來下
珮環聲急誰信天鋒飛墮地傍湖千丈開青壁
是當年玉斧削方壺無人識
山水潤琅玕溼

秋露下瓊珠滴向危亭橫跨玉淵澄碧醉舞且
搖鸞鳳影浩歌莫遣魚龍泣恨此中風物本吾
家今爲客

又

再用
前韻

照影溪梅悵絕代佳人獨立便小駐雍容千騎
羽觴飛急琴裏新聲風響珮筆端醉墨鴉棲壁
是使君文雅舊知名今方識高欲臥雲還溼
清可漱泉長滴快晚風吹帽滿懷空碧寶馬嘶

歸紅旆動龍團試水銅瓶泣怕他年重到路應
迷桃源客

又

席間和洪景廬舍人
兼司馬漢章大監

天與文章看萬斛龍文筆力聞道是一詩曾換
千金顏色欲說又休新意思彊啼偷笑真消息
算人人合與共乘鸞坡客 傾國艷難再得
還可恨還堪憶看書尋舊錦衫裁新碧鶯蝶一
春花裏活可堪風雨飄紅白問誰家却有燕歸

梁香泥溼

又

送湯朝美司諫
自汴歸金壇

瘴雨蠻煙十年夢
尊前休說春正好
故園桃李待君花
發兒女燈前和淚
拜雞豚社裏歸時
節看依然舌在齒
牙牢心如鐵活國
手封侯骨騰汗漫
排闥闔待十分做
了詩書勲業當日
念君歸去好而今
却恨中年別笑江
頭明月更多情今
宵缺

又

送李正之
提刑入蜀

蜀道登天一盃送繡衣行客還自歎中年多病
不堪離別東北看鰲諸葛表西南更艸相如檄
把功名收拾付君侯如椽筆兒女淚君休滴
荆楚路吾能識要新詩準備廬山山色赤壁磯
頭千古浪銅鞮陌上三更月正梅花萬里雪淡
時須相憶

又

送信守鄭
舜舉被召

湖海平生算不負蒼髯如戟聞道是使君著意
太平長策此老自當兵十萬長安正在天西北
便鳳凰飛詔下天來催歸急車馬路兒童泣
風雨暗旌旗溼看野梅官柳東風消息莫向蔑
菴追笑語只今松竹無顏色問人間誰管別離
愁杯中物

又

和楊民瞻送佑
之弟還侍浮梁

塵土西風便無限淒涼行色還記取明朝應恨

今宵輕別珠淚爭垂華燭暗雁行欲斷哀箏切
看扁舟幸自澗清溪休催發白石路長亭側
千樹柳千絲結怕行人西去棹歌聲闌黃卷莫
教詩酒污玉階不信仙凡隔但從今伴我又隨
君佳哉月

又

遊南巖和
范先之韻

笑拍洪崖問千丈翠巖誰削依舊是西風白鳥
北村南郭似整復斜僧屋亂欲吞還吐林煙薄

覺人間萬事到秋來都搖落
呼斗酒同君酌
更小隱尋幽約且丁寧休負北山猿鶴有鹿從
渠求鹿夢非魚定未得魚樂正仰看飛鳥却應
人回頭錯

又

和范先
之雪

天上飛瓊畢竟向人間情薄還又跨玉龍歸去
萬花搖落雲破林梢添遠岫月明屋角分層閣
記少年駿馬走韓盧掀東郭吟凍雁嘲飢鵲

人已老歡猶昨對瑤華滿地與君酬酢最愛霏
霏迷遠近都收擾擾還空濶待羔兒飲罷又烹
茶揚州鶴

又

病中俞山甫教授
訪別病起寄之

曲几團蒲記方丈君來問疾更夜雨匆匆別去
一盃南北萬事莫侵閑鬢髮百年正要佳眠食
最難忘此語重殷勤千金值西崦路東巖石
攜手處今塵迹望東來猶有舊盟如日莫信蓬

萊風浪隔垂天自有扶搖力對梅花一夜苦相
思無消息

又

錢鄭衡州厚
卿席上再賦

莫折荼蘼且留取一分春色還待得青梅如豆
笑伊同摘少日對花渾醉夢而今醒眼看風月
恨牡丹笑我倚東風頭如雪榆莢錢菖蒲葉
時節換繁華歇算怎禁風雨怎禁鶉鴉老冉冉
兮花笑柳是栖栖者蜂和蝶也不因春去有閑

愁因離別

又 送徐行
仲撫幹

絕代佳人曾一笑傾城傾國休更歎舊時青鏡
而今華髮明日伏波堂上客老當益壯翁應說
恨苦遭鄧禹笑人來長寂寂 詩酒社江山筆
松菊徑雲煙屐怕一觴一詠風流絃絕我夢橫
山孤鶴去覺來却與君相別記功名萬里要咎
身佳眠食

文

紫陌飛塵望十里雕鞍繡轂春未老已驚臺榭
瘦紅肥綠睡雨海棠猶倚醉舞風楊柳難成曲
問流鶯能說故園無曾相熟巖泉上飛鳬浴
巢林下棲禽宿恨荼蘼開晚謾翻紅玉蓮社豈
堪談昨夢蘭亭何處尋遺墨但羈懷空自倚軟
轡無心蹴

又

盧國華由閩憲移潛建安陳端仁給事
同諸公餞別余爲酒困臥清涂堂上三

鼓方醒國華賦詞
曲別席上和韻

宿酒醒時算只有清愁而已人正在清涂堂上
月華如洗紙帳梅花歸夢覺尊羹鱸膾秋風起
問人生得意幾何時吾歸矣君若問相思事
料長在歌聲裏這情懷只是中年如此明月何
妨千里隔顧君與我如何耳向尊前重約幾時
來江山美

又

和盧國華

漢節東南看駟馬光華周道須信是七閩還有
福星來到庭艸自生心意足榕陰不動秋光好
問不知何處著君侯蓬萊島還自笑人今老
空有恨縈懷抱記江湖十載厭持旌纛溲落我
材無所用易除殆類無根潦但欲搜好語謝新
詞羞瓊報

又

山居
卽事

幾箇輕鷗來點破一泓澄綠更何處一雙鷓鴣

故來爭浴細讀離騷還痛飲飽看脩竹何妨肉
有飛泉曰曰共明珠五千斛 春雨滿秧新穀
閑日永眠黃犢看雲連麥隴雪堆蠶簇若要足
時今足矣以爲未足何時足被野老相扶入東
園枇杷熟

又

和傅巖叟
香月韻

半山佳句最好是吹香隔屋又還怪冰霜側畔
蜂兒成簇更把香來薰了月却教影去斜侵竹

似神清骨冷住西湖何由俗
根老大穿坤軸
枝天嫋蟠龍斛快酒兵長俊詩壇高築一再人
來風味惡兩三盃後花緣熟記五更聯句失彌
明龍啣燭

又

壽趙茂嘉郎中前
章記兼濟倉事

我對君侯怪長見兩眉陰德還夢見玉皇金闕
姓名仙籙舊歲炊煙渾欲斷被公扶起千人活
算胸中除却五車書都無物
山左右溪南北

花遠近雲朝夕看風流杖屨蒼髯如戟種柳已
成陶令宅散花更滿維摩室勸人間且住五千
年如金石

又

呈趙晉
臣數文

老子平生原自有金盤華屋還又要萬間寒士
眼前突兀一舸歸來輕似葉兩翁相對清如鵠
到如今吾亦愛吾廬多松菊 人道是荒年穀
還又似豐年玉甚等閑却爲鱸魚歸速野鶴溪

邊留杖屨行人牆外聽絲竹問近來風月幾篇
詩三千軸

又

游清風峽和趙
晉臣數文韻

兩峽嶄巖問誰占清風舊築滿眼裏雲來

鳥澗
去

紅山綠世上無人供笑傲門前有客休迎肅怕
淒涼無物件君時多栽竹風采妙凝冰玉詩
句好餘膏馥嘆只今人物一變應足人似秋鴻
無定住事如飛彈須圓熟笑君侯陪酒又陪歌

陽春曲

木蘭花慢

席上送張仲
國帥興元

漢中開漢業問此地是耶非想劒指三秦君王
得意一戰東歸興亡事今不見但山川滿目淚
沾衣落日胡塵未斷西風塞馬空肥一篇書
是帝王師小試去征西更艸艸離筵匆匆去路
愁滿旌旗君思我回首處正江涵秋影雁初飛
安得車輪四角不堪帶減腰圍

又

滁州送
范倅

老來情味減對別酒怯流年況屈指中秋十分
好月不照人圓無情水都不管共西風只管送
歸船秋晚蓴鱸江上夜淡兒女燈前 征衫便
好去朝天玉殿正思賢想夜半承明畱教視艸
却遣籌邊長安故人問我道愁腸殢酒只依然
目斷秋霄落雁醉來時響空絃

又

題上饒州
園翠微樓

舊時樓上客愛把酒對南山笑白髮如今天教
放浪來往其間登樓更誰念我却回頭西北望
層欄雲雨珠簾画棟笙歌霧鬢風鬟近來堪
入畫圖看父老願公歡甚拄笏悠然朝來爽氣
正爾相關難忘使君後日便一花一艸報平安與
客攜壺且醉雁飛秋影江寒

又

寄題吳克明
廣文菊隱

路傍人怪問此隱者姓陶不甚黃菊如雲朝吟

算醉喚不回頭縱無酒成悵望只東籬搔首亦
風流與客朝食一笑落英飽便歸休 古來堯
舜有巢由江海去悠悠待說與佳人種成香艸
莫怨靈脩我無可無不可意先生出處有如丘
閨道問津人過殺雞爲黍相留

水龍吟

旅次登樓作

楚天千里清秋水隨天去秋無際遙岑遠目獻
愁供恨玉簪螺髻落日樓頭斷鴻聲裏江南游

子把吳鉤看了欄干拍徧無人會登臨意休
說鱸魚堪膾儘西風季鷹歸未求田問舍怕應
尋見劉郎才氣可憐流年憂愁風雨樹猶如此
倩何人喚取紅巾翠袖搵英雄淚

又

甲辰歲寄韓
南澗尚書

渡江天馬南來幾人真是經綸手長安父老新
亭風景可憐依舊夷甫諸人神州沉陸幾曾回
首算平戎萬里功名本是眞儒事公知否況

有文章山斗對桐陰滿庭清晝當年墮地而今
試看風雲犇走綠野風煙平泉艸木東山歌酒
待他年整頓乾坤事了爲先生壽

又

次年南澗用韻爲僕與公生日相去一日再和以壽南澗

玉皇殿閣微涼看公重試薰風手高門畫戟桐
陰聞道青青如舊蘭佩空芳蛾眉誰妒無言搔
首甚年年却有呼韓塞上人爭問公安否金
印明年如斗向中州錦衣行畫依然盛事貂蟬

前後鳳麟飛走富貴浮雲我評軒冕不如盃酒
待從公痛飲八千餘歲伴莊椿壽

又

盤園任子嚴安撫挂冠得請客
以高風名其堂書來索詞爲賦

斷崖千丈孤松挂冠更在松高處平生袖手故
應休矣功名良苦笑指兒曹人間醉夢莫嗔驚
汝問黃金餘幾旁人欲說田園記君推去嘆
息薌舊隱對先生竹窗松戶一花一艸一觴一
詠風流杖屨野馬塵埃扶搖下視蒼然如許恨

當年九老圖中忘却花盤園林路

又

寄題京口范南伯知縣家文官花花
白次緋次紫唐會要載學士院有之

倚欄看碧成珠等閒褪了香袍粉上林高選
匆又換紫雲衣溼幾許春風朝薰暮染爲花忙
損笑舊家桃李東塗西抹有多少淒涼恨擬
倩流鶯說與記榮華易消難整人間得意千紅
萬紫轉頭春盡白髮憐君儒冠曾悞平生官冷
算風流未減年年醉裏把花枝問

又

題雨巖巖類今所題觀音普
施巖中有泉飛出如風雨聲

普陀大士虛空翠巖記取飛來處蜂房萬點似
穿如碍玲瓏窗戶石髓千年已垂未落隣响水
柱有怒濤聲遠落花香在人疑是桃源路 又
說春雷鼻息是臥龍彎環如許不然應是洞庭
張樂湘靈來去我意長松倒生陰壑細吟風雨
竟茫茫未曉只應白髮是開山祖

又

瓢泉

稼軒何必長貧放泉簷外瓊珠瀉樂天知命古
來誰會行藏用舍人不堪憂一瓢自樂賢哉回
也料當年嘗問飯蔬食飲水何爲是栖栖者
且對浮雲山上莫匆匆去流山下蒼顏照影故
應零落輕裘肥馬遶齒冰霜滿懷芳乳先生飲
罷笑挂瓢風樹一鳴渠碎問何如啞

又

用瓢泉韻盛仁和兼
諸葛元亮且督和詞

被公驚倒瓢泉倒流三峽詞源瀉長安紙貴流

傳一字千金爭舍割肉懷歸先生自笑又何廉
也但啣盃莫問人間豈有如孺子長貧者誰
識稼軒心事似風乎舞雩之下回頭落日蒼茫
萬里塵埃野馬更想隆中臥龍千尺高吟纔罷
倩何人與問雷鳴瓦釜甚黃鍾啞

又

用夢語再韻瓢泉歌以飲
客聲語甚諧客皆爲之釀

聽兮清珮瓊瑤夢剛兮鏡秋毫夢君無去此流
昏漲賦生蓬蒿夢虎豹甘人渴而汝寧猿獠夢

大而流江海覆舟如芥君無助狂濤些

路險今

山高些愧余獨處無聊些冬槽春盜歸來爲我
製松醪些其外芬芳團龍片鳳煑雲膏些古人
今既往嗟余之樂樂簞瓢些

又

過南澗
雙溪樓

舉頭西北浮雲倚天萬里須長劒人言此地夜
溪長見斗牛光焰我覺山高潭空水冷月明星
淡待燃犀下看凭欄却怕風雷怒魚龍慘峽

東蒼江對起過危樓欲飛還歛元龍老矣不妨
高臥冰壺涼簟千古興亡百年悲笑一時登覽
問何人又卸片帆沙岸繫斜陽纜

又

愛李延年歌薄千髭語今爲詞
庶幾高唐神女洛神賦之意云

晉時曾有佳人翩然絕世而獨立未論一顧傾
城再顧又傾人國寧不知其傾城傾國佳人難
再得看行雲行雨朝朝暮暮陽臺下襄王側
堂上更闌燭滅記主人鬢髮送客合尊促坐羅

襦襟解微聞薌澤當此之時止乎禮義不淫其
色但啜其泣矣啜其泣矣又何差及

又

別傳先之提舉
時先之有召命

只愁風雨重陽息君不見令人老行期定否征
車幾輛去程多少有客書來長安却早傳聞追
詔問歸來何日君家舊事直須待爲霖了從
此蘭生蕙長吾誰與玩茲芳艸自憐拙者功名
相避去如飛鳥只有良朋東阡西陌安排似巧

到如今巧處依然又拙把平生笑

又

老來曾識淵明夢中一見參差是覺來幽恨停
觴不御欲歌還止白髮西風折腰五斗不應堪
此問北窗高臥東籬自醉應別有歸來意須
信此翁未死到如今凜然生氣吾儕心事古今
長在高山流水富貴他年直饒來晚也應無味
甚東山何事當時也道爲蒼生起

摸魚兒

淳熙己亥自湖北漕移湖南同官王正之置酒小山亭賦

更能消幾番風雨。匆匆春又歸去，惜春長怕花
開早。何況落紅無數。春且住。見說道天涯芳艸
無歸路。怨春不語。算只有殷勤，畫簷蛛網盡圓
惹飛絮。長門事。準擬佳期又誤。蛾眉曾有人
妒。千金曾買相如賦。脉脉此情誰訴。君莫舞。君
不見玉環飛燕皆塵土。閑愁最苦。休去倚危欄
斜陽正在煙柳斷腸處。

又

觀潮上
葉丞相

望飛來半空鷗鷺須臾動地鼙鼓截江組練驅
山去鏖戰未收貔虎朝又暮悄悄慣得吾兒不怕
蛟龍怒風波平步看紅旆驚飛跳魚直上蹙踏
浪花舞 憑誰問萬里長鯨吞吐人間兒戲千
弩滔天力倦知何事白馬素車東去堪恨處人
道是屬餒怨情足千古功名自誤謾教得陶朱五
湖西子一舸弄煙雨

又

雨巖有石狀甚怪取離騷九歌名曰山鬼因賦摸魚兒收名山鬼謠

問何年此山來此西風落日無語看君似是義
皇上直作太虛名汝溪上算只有紅塵不到今
猶古一盃誰舉笑我醉呼君崔嵬未起山鳥覆
盃去須記取昨夜龍湫風雨門前石浪掀舞
四更山鬼吹燈嘯驚倒世間兒女依然處還問
我清遊杖屨公良苦神交心許待萬里攜君鞭
笞鸞鳳送我遠遊賦

石浪菴外巨石也長三十餘丈

西河

送錢仲耕自江
西漕移守婺州

西江水道是西江人淚無情却解送行人月明
千里從今日日倚高樓傷心煙樹如薺會君難
別君易艸艸不如人意十年著破繡衣茸種成
桃李問君可是厭承明東方鼓吹千騎對梅
花更消一醉看明年調鼎風味老病自憐憔悴
過吾廬定有幽人相問歲晚淵明歸來未

永遇樂

送陳仁和自汴東歸陳至
上饒之一年得子甚喜

紫陌長安看花年少無限歌舞白髮憐君尋芳
較晚捲地驚風雨問君知否鴟夷載酒不似并
瓶身誤細思量悲歡夢裏覺來總無尋處 忙
鞋竹杖天教還了千古玉樓佳句落魄東歸風
流贏得掌上明珠去起看青鏡南冠好在拂了
舊時塵土向君道雲霄萬里這回穩步

又
梅雪

怪底寒梅一枝雪裏只恁愁絕問訊無言依稀

似妒天上飛英白江上一夜瓊瑤萬頃此段如
何妒得細看來風流添得自家越樣標格晚
來樓上對花臨鏡學作半粧額著意爭妍那知
却有人妒花顏色無情休問許多般事且自訪
梅踏雪待行過溪橋夜半更邀素月

又

戲賦辛字送茂
嘉十二第赴調

烈日秋霜忠肝義膽千載家譜得姓何年細參
辛字一笑君聽取艱辛做就悲辛滋味總是辛

酸辛苦更十分向人辛辣椒桂搗殘堪吐世
間應有芳甘濃美不到吾家門戶比著兒曹
纍却有金印光垂組付君此事從今直上休
憶對牀風雨但贏得韡綬縈面記余戲語

又

檢校停雲新種杉松戲作時欲作親舊
報書紙筆偶爲大風吹去末章因及之

投老空山萬松手種政爾堪嘆何日成陰吾年
有幾似見兒孫晚古來池館雲煙艸棘長使後
人淒斷想當年良辰已恨夜闌酒空人散停

雲高處誰知者子萬事不關心眼夢覺東窗聊
復爾爾起欲題書簡霎時風怒倒翻筆硯天也
只教吾懶又何事催急急雨片雲斗暗

又

京口北固亭懷古

千古江山英雄無覓孫仲謀處舞榭歌臺風流
總被雨打風吹去斜陽艸樹尋常巷陌人道寄
奴曾住想當年金戈鐵馬氣吞萬里如虎元
嘉艸艸封狼居胥贏得倉皇北顧四十三年望

中猶記烽火揚州路可堪回首佛狸詞下一片
神鴉社鼓憑誰問廉頗老矣尚能飯否

歸朝歡

靈山齊菴菖蒲港皆長松茂林獨
野櫻花一林山上盛開照映可愛

不數日風雨催敗殆盡意有感悟因效介
菴體爲賦且以菖蒲綠名之丙辰歲三

月三日也

山下千林花太俗
山上一枝看不足
春風正在此花邊
菖蒲自蘸清溪綠
與花同艸木
問誰風雨飄零速
莫悲歌夜淡巖下驚動白雲宿
病

怯殘年頻自卜老愛遺篇難細讀苦無妙手画
於菟人間雕刻真成鵠夢中人似玉覺來更憶
腰如束許多愁問君有酒何不日絳竹

又

寄題三山鄭元英巢經樓樓之側有尚友齋欲借書者就齋中取讀書不借出

萬里康成西走蜀藥市船歸書滿屋有時光彩
射星躔何人汗簡讎天祿好之寧有足請看良
賈藏金玉記斯文千年未喪四壁聞絲竹 試
問辛勤攜一束何以牙籤三萬軸古來不作僭

人癡有朋只就芸窗讀憶君清夢熟覺來笑我
便便腹倚危樓人間誰舞掃地八風曲

又

題趙晉臣敷
文積翠巖

我笑共工緣底怒觸斷我我天一柱補天又笑
女媧忙却將此石投閑處野煙荒艸路先生拄
杖來看汝倚蒼苔摩挲試問千古幾風雨長
被兒童敲火苦時有牛羊磨角去霍然千丈翠
巖屏鏘然一滴甘泉乳結亭三四五會相暖熱

攜歌舞細思量古來寒士不遇有時遇

又

丁卯歲寄題眉山李參政石林

見說岷峨千古雪都作岷峨山上石君家右史
老泉公千金未盡勤收拾一堂真石石閑庭更
與天突兀記當時長編筆硯日日雲煙溼野
老時逢山鬼泣誰夜持山去難覓有人依樣入
明光玉堦之下巖巖立琅玕無數碧風流不數
平泉物欲重吟青葱玉樹須倩子雲筆

一枝花

醉中戲作

千丈擎天手萬卷懸河口黃金腰下印大如斗
更千騎弓刀揮霍遮前後百計千方久似鬪艸
兒童羸箇他家偏有算枉了雙眉長皺白髮
空回首那時間說向山中友看丘隴牛羊更辨
賢愚否且自我花柳怕有人來但只道今朝中
酒

喜遷鶯

謝趙晉臣敷文賦芙蓉詞見壽用韻爲謝

暑風涼月愛亭亭無數綠衣持節掩冉如羞參
差似妒擁出芙渠花發步襯潘娘堪恨貌比六
郎誰潔添白鷺晚晴時公子佳人竝列休說
攀木末當日靈均恨與君王別心阻媒勞交疎
怨極恩不甚兮輕絕千古離騷文字至今猶未
歇都休問但千盃快飲露荷翻葉

瑞鶴仙

壽上饒倅洪莘之時
攝郡事且將赴漕舉

黃金堆到斗怎得似長年畫堂勸酒蛾眉最明

秀向水沉煙裏兩行紅袖笙歌擁就爭說道明年時候被姮娥做了慇懃仙桂一枝入手知否風流別駕近日人呼文章太守天長地久歲上廼翁壽記從來人道相門出相金印累累儘有但直須周公拜前魯公拜後

又
賦
梅

雁霜寒透幙正護月雲輕嫩冰猶薄溪奩照梳掠想含香弄粉豔粧難學玉肌瘦弱更重重龍

銷襯著倚東風一笑嫣然轉盼萬花羞落寂
寞家山何在雪後園林水邊樓閣瑤池舊約鄰
翁更仗誰托粉蝶兒只是尋桃覓柳開遍南枝未
覺但傷心冷落黃昏數聲畫角

又

南澗雙
溪樓

片帆何太急望一點須臾去天咫尺舟人好看
客似三峽風濤嗟峨劒戟溪南溪北正遐想幽
人泉石看漁樵指點危樓却羨舞筵歌席嘆

息山林鍾鼎意倦情遷本無欣戚轉頭陳迹飛
鳥外晚煙碧問誰憐舊日南樓老子最愛月明
吹笛到而今撲面黃塵欲歸未得

聲聲慢

旅次登樓作

征埃成陣行客相逢都道幼出層樓指點簷牙
高處浪湧雲浮今年太平萬里罷長淮千騎臨
秋凭欄望有東南佳氣西北神州 千古懷嵩
人去還笑我身在楚尾吳頭看取弓刀陌上車

三十一
馬如流從今賞心樂事剩安排酒令詩籌華胥
夢願年年人似舊游

又

嘲紅木犀余兒時嘗入京師
禁中凝碧池因書當時所見

開元盛日天上栽花月殿桂影重重十里芬芳
一枝金粟玲瓏管絃凝碧池上記當時風月愁
儂翠華遠但江南艸木煙鎖淡宮只爲天姿
冷澹被西風醞釀徹骨香濃枉學丹蕉葉底偷
染妖紅道人取次裝束是自家香底家風又怕

是爲淒涼長在醉中

又

送上饒黃倅
職滿赴調

東南形勝人物風流白頭見君恨晚便覺君家
叔度去人未遠長憐士元驥足道直須別駕方
展問箇裏待怎生銷殺胸中萬卷 況有星辰
劒履是傳家合在玉皇香案零落新詩我欠可
人消遣畱君再三不住便直饒萬家淚眼怎抵
得這睂間黃色一點

又

曉括淵明
停雲詩

停雲靄靄八表同昏盡日時雨濛濛搔首良
門前平陸成江春醪湛湛獨撫恨彌襟閑飲東
窗空延佇恨舟車南北欲往何從嘆息東園
佳樹列初榮枝葉再競春風日月于征安得促
席從容翩翩何處飛鳥息庭柯好語和同當年
事問幾人親友似翁

八聲甘州

壽建康帥胡長文給事時方閑
拚紅梅之舞且有錫帶之寵

把江山好處付公來金陵帝王州想今年燕子
依然認得王謝風流只用平時算俎彈壓萬貌
貅依舊鈞天夢玉殿東頭看取黃金橫帶是
明年準擬丞相封侯有紅梅新唱香陣卷溫柔
且畫堂通宵一醉待從今更數八千秋公知否
邦人香火夜半纔收

又

夜讀李廣傳不能寐因念晁楚老楊民瞻約同在山間戲用李廣事賦以寄之

故將軍飲罷夜歸來長亭解雕鞍恨灞陵醉尉

匆匆未識桃李無言射虎山橫一騎裂石響驚
弦落魄封侯事歲晚田園誰向桑麻杜曲要
短衣匹馬移住南山看風流慷慨談笑過殘年
漢開邊功名萬里甚當時健者也曾閑紗窗外
斜風細雨一陣輕寒

雨中花慢

登新樓有懷趙昌甫徐斯遠韓仲正吳子似楊民瞻

舊雨常來今雨不來佳人偃蹇誰畱幸山中芋
栗今歲全收貧賤交情落落古今吾道悠悠怪

新來却見文友離騷詩發秦州 功名只道無
之不樂那知有更堪憂怎奈向兒曹抵死喚不
回頭石臥山前認虎蟻喧牀下聞牛爲誰西望
憑欄一餉却下層樓

又

吳子似見和
再用韻爲別

馬上三年醉帽吟鞍錦囊詩卷長畱悵溪山舊
管風月新收明便關河杳杳去應日月悠悠笑
千篇索價未抵蒲桃五斗涼州 停雲老子有

酒盈尊琴書端可消憂
渾未解傾身一飽淅米
矛頭心似傷弓塞雁身
如喘月吳牛曉天涼夜
月明誰伴吹笛南樓

漢宮春

立春

春已歸來看美人頭上
裊裊春幡無端風雨未
肯收盡餘寒年時燕子
料今宵夢到西園渾未
辦黃柑薦酒更傳青韭
堆盤却笑東風從此
便薰梅染柳更沒些閑
閑時又來鏡裏轉變朱

顏清愁不斷問何人會解連環生怕見花開花
落朝來塞雁先還

又

事

行李溪頭有釣車茶具曲几團蒲兒童認得前
度過者籃輿時時照影甚此身徧滿江湖悵野
老行歌不住定堪與語難呼一自東籬搖落
問淵明歲晚心賞何如梅花政自不惡曾有詩
無知翁止酒待重教蓮社人沽空悵望風流已

三十五
矣江山特地愁余

又

曾稽蓬萊
閣懷古

秦望山頭看亂雲
急雨倒立江湖不知雲者爲
雨雨者雲乎長空萬里被西風
變滅須臾回首聽月明天籟人
間萬竅號呼誰向若耶溪上
倩美人西去麋鹿姑蘇至今故
國人望一舸歸歟歲云暮矣問
何不鼓瑟吹竽君不見王亭謝
館冷煙寒樹啼鳥

又會稽秋風
亭觀雨

亭上秋風記去年
嫋嫋曾到吾廬
山河舉目雖異
風景非殊
功成者去
覺團扇便與人疎
吹不斷
斜陽依舊茫茫
禹跡都無
千古茂林猶在
甚風流章句解
擬相如
只今木落江冷
耿耿愁余
故人書報
莫因循
忘却尊罍
誰念我新涼燈
火一編太史公書

又
荅李兼善
提舉和章

心似孤僧更茂林脩竹山上精廬維摩定自非
病誰遣文殊白頭自憺歎相逢語密情疎傾蓋
處論心一語只今還有公無最喜陽春妙句
被西風吹墮金玉鏗如夜來歸夢江上父老歡
余荻花淡處喚兒童吹火烹鱸歸去也絕交何
必更脩山巨源書

又

俞吳子似
總幹和章

達則青雲便玉堂金馬窮則茅廬逍遙小大自

適鵬鷄何殊君如星斗燦中天密密疎荒艸
外自憐螢火清光暫有還無 千古季鷹猶在
向松江道我問訊何如白頭愛山下去翁定嘆
余人生謾爾豈食魚必膾之鱸還自笑君詩頻
覺胸中萬卷藏書

滿庭芳

和丞相景伯韻

傾國無媒入宮見妒古來顰損蛾眉看公如月
光彩衆星稀袖手高山流水聽群蛙鼓吹荒池

文章手直須補袞藻火燦宗彝 癡兒公事了
吳蠶纏繞自吐餘絲幸一枝纔穩三徑新治且
約湖邊風月功名事欲使誰知都休問英雄千
古荒艸沒殘碑

又

和黃魯直韻
郭景虛內翰

急管哀絃長歌慢舞連娟十樣宮眉不堪紅紫
風雨曉稀稀惟有楊花飛絮依舊是萍滿芳池
醺醺在青虬快剪插遍古銅彝 誰將春色去

驚膠難覓絃斷蛛絲恨牡丹多病也費醫治夢
裏尋春不見空斷腸怎得春知休惆悵一觴一
詠須刻右軍碑

又

游豫章東湖再用韻

柳外尋春花邊得句怪公喜氣軒眉陽春白雪
清唱古今稀曾是金鑿舊客記鳳凰獨遶天池
揮毫罷天顏有喜催賜尚方藥

公在詞掖嘗拜尚方實彛之賜

只今江山遠鈞天夢覺清淚如絲算除非痛把

酒療花治明日五湖佳興扁舟去一笑誰知溪
堂好且拚一醉倚杖讀韓碑

堂記公所製也

又

和章泉
趙昌父

西崦斜陽東江流水物華不爲人流崢然一葉
天下已知秋屈指人間得意問誰是騎鶴揚州
君知我從來雅興未老已滄洲無窮身外事
百年能幾一醉都休恨兒曹抵死謂我心憂況
有溪山杖屨阮藉輩須我來游還堪笑機心早

覺海上有驚鷗

六么令

用陸氏事送玉山令陸德隆侍親東歸吳中

酒群花隊攀得短轅折誰憐故山歸夢千里尊
羹滑便整松江一棹檢點能言鴨故人欲接醉
懷霜橘墮地金圓醒時覺長喜劉郎馬上肯
聽詩書說誰對叔子風流直把曹劉壓更看君
侯事業不負平生學離腸愁怯送君歸後細寫
茶經煮香雪

又

再用
前韻

倒冠一笑華髮玉簪折陽關自來淒斷却怪歌
聲滑放浪兒童歸舍莫惱比隣鴨水連山接看
君歸興如醉中醒夢中覺江上吳儂問我一
一煩君說忍使尊酒頻空賸欠珍珠壓手把漁
竿未穩長向滄浪學問愁誰怯可堪楊柳先作
東風滿城雪

醉翁操

項余從范先之求觀家譜見其冠
冕蟬聯世載勳德先之甚文而好

修意其昌未艾也時單度勲臣子孫無
見任者命官之先是屢試甄錄元祐黨
藉家合是二者先之應仕矣將告諸朝
行有日請余作詩以贈歸余避謗持此
戒甚力不得如先之之請又念先之與
余遊八年日從事詩酒間意相得歡甚
於其別也何獨能惻然顧先之長於楚
詞而妙於琴輒擬醉翁操爲之詞以叙
別興時先之綰組東歸僕當年買羊沽
酒先之爲鼓一再行以爲山中盛事云
長松之風如公肯余從山中人心與吾兮誰同
湛湛千里之江上有楓噫送子東望君之門兮
九重女無悅已誰適爲容不龜手藥或一朝

取封昔與遊兮皆童我獨窮兮今翁一魚兮一
龍勞心兮忡忡噫命與時逢子之所食兮萬鍾

醜奴兒近

博山道中效
李易安體

千峰雲起驟雨一霎兒價更遠樹斜陽風景怎
生圖畫青旗賣酒山那畔別有人家只消山水
光中無事過者一霎 午睡醒時松窗竹戶萬
千瀟灑野鳥飛來又是一飛流萬壑共千巖爭
秀孤負平生弄泉手歎輕衫帽幾許紅塵還自

喜濯髮滄浪依舊 人生行樂耳身後虛名何
似生前一盃酒便此地結吾廬待學淵明更手
種門前五柳且歸去父老約重來問如此青山
定重來否

洞仙歌

浮石山莊余友月湖道人何同叔之別墅也山類羅浮故以名同叔

嘗作遊山次序榜示余且索詞爲賦洞仙歌以遺之同叔頃遊羅浮遇一老人
龐眉幅巾語同叔云當有晚年之契蓋倦云

松關桂嶺望菁葱無路費盡銀鈎榜佳處帳空

四十一
山歲晚窈窕誰來須著我醉臥石樓風雨僊
人瓊海上握手當年笑許君攜半山去剗疊嶂
卷飛泉洞府淒涼又却怕先生多取怕夜半羅
浮有時還好長把雲煙再三遮住

又
開南樓
初成賦

婆娑欲舞怪青山歡喜分得清溪半篙水記平
沙鷗鷺落日漁樵湘江上風景依然如此東
籬多種菊待學淵明飲酒詩情相似十里漲春

波一棹歸來只做箇五范蠡是則是一般弄扁

舟爭知道他家有箇西子

又

趙晉臣和李能伯韻屬余同和趙以兄弟有職名爲龍詞中頗敘其盛故米章有裂土分茅之句

舊交貧賤太半成新貴冠蓋門前幾行李看匆匆
哂笑爭出山來憑誰問小艸何如遠志悠
今古事得喪乘除算四朝三又何異任掀天事
業冠古文章有幾箇笙歌晚歲況滿屋貂蟬未

爲榮記裂土分茅是公家世

又

丁卯八月
病中作

賢愚相去算其間能幾差以毫釐繆千里細量
義利舜跖之分孳孳者等是雞鳴而起味甘
終易壞歲晚還知君子之交淡如水一餉聚飛
蚊其響如雷淡白覺昨非今是羨安樂窩中泰
和湯夏劇飲無過半醺而已

驀山溪

停雲竹
遷初成

小橋流水欲下前溪去喚起故人來伴先生風
煙杖屨行穿窈窕時歷小崎嶇斜帶水半遮山
翠竹栽成路一尊遐想剩有淵明趣山上有
停雲看山下濛濛細雨野花啼鳥不肯入詩來
還一似笑翁詩自沒安排處

又

趙昌父賦一丘一壑
格律高古因效其體

飯蔬飲水客莫嘲吾拙高處看浮雲一丘壑中
間甚樂功名妙手壯也不如人今老矣尙何堪

四十三
堪釣前溪月 病來止酒辜負鷓鴣杓歲晚念
平生待都與鄰翁細說人間萬事先覺者賢乎
淡雪裏一枝開春事梅先覺

最高樓

醉中有索四
時歌爲賦

長安道投老倦遊歸七十古來稀藕花雨溼前
湖夜桂枝風澹小山時怎消除須殢酒更吟詩
也莫向竹邊辜負雪也莫向柳邊辜負月閑
過了總成癡種花事業無人問惜花情緒只天

知笑山中雲出早鳥歸遲

又

和楊民瞻席上用韻賦牡丹

西園買誰載萬金歸多病勝遊稀風斜畫燭天
香夜涼生翠盞酒酣時待重尋居士譜謫僊詩
看黃底御袍元自賢看紅底狀元新得意如
斗大笑花癡漢妃翠被嬌無奈吳姬粉陣恨誰
知但紛紛蜂蝶亂笑春遲

又

送丁懷忠教授入廣渠赴調都下久不得書或謂從人辟置或謂復歸閩中矣

相思苦君與我同心魚沒雁沉沉是夢松後追
軒冕是化鶴後去山林對西風且悵望到如今
待不飲奈何君有恨待痛飲奈何吾又病君
起舞試重斟蒼梧雲外湘妃淚鼻亭山下鷓鴣
吟早歸來流水外有知音

又

慶洪景廬
內翰七十

金閨彥眉壽正如川七十且華筵樂天詩句香
山裏杜陵酒債曲江邊問何如歌筍寵舞嬋娟

夏十歲太公方出將又十歲武公方入相
盛事看明年直須腰下添金印莫教頭上欠貂
蟬向人間長富賢地行僊

又

開前岡周氏
旌表有則

君聽取尺布尚堪縫斗粟也堪春人間朋友猶
能合古來兄弟不相容棣華詩悲二叔吊周公
長歎息春令原上急重歎息豆箕煎正泣形
則與氣應同周家五世將軍後前岡千載義居

風看明朝丹鳳詔紫泥封

又

客有敗基
者代賦梅

花知否花一似何郎又似沈東陽瘦稜稜地天
然白冷清清地許多香笑東君還又向北枝忙
著一陣霎時間底雪更一箇缺些兒底月山
下路水邊牆風流怕有人知處影兒守定竹旁
廂且饒他桃李趁少年場

又

用禽韻詩
晉臣數文

花好處不趁綠衣郎縞袂立斜陽面皮兒上因
誰白骨頭兒裏幾多香儘饒他心似鐵也須忙
甚喚得雪來白倒雪便喚得月來香殺月誰
立馬更窺牆將軍止渴山南畔相公調鼎殿東
廂忒高才經濟地戰爭場

又

吾擬乞歸犬子以田產
米置止我賦此罵之

吾衰矣須富賢何時富賢是危機暫忘設醴抽
身去未曾得米棄官歸穆先生陶縣令是吾師

待葺箇園兒名佚老更作箇亭兒名亦好閑
飲酒醉吟詩千年田換八百主一人口插幾張
匙咄豚奴愁產業豈佳兒

上西平

會稽秋風
亭觀雪

九衢中孟逐馬帶隨車問誰解愛憺瓊華何如
竹外靜聽翠翠蟬行沙自憐是海山頭種玉人
家紛如鬬嬌如舞纔整整又斜斜要圖畫還
我漁蓑凍吟應笑羔兒無分謾煎茶起來極目

向彌茫數盡歸鴉

又

送村
叔高

恨如新新恨了又重新看天上多少浮雲江南
好景落花時節又逢君夜來風雨春歸似欲畱
人尊如海人如玉詩如錦筆如神更能幾字盡
殷勤江天日暮何時重與細論文綠楊陰裏聽
陽關門掩黃昏

稼軒詞卷第二

終